



Herrenmettchen – Klicke 1997

Vulgo : Herremättli-Clique

Süschee:

Mir leere Deytsch

Salü, scher visitör du carnaval de Bäle

Cari visitori del carnevale de Basilea

Diir visitor of the carnival of Basel

Ναστροπε Βασιλφεω Φασυαχητωω

Liebi

In däm Joor bin ich als Värslibrinzler dräggig dra,
Verglemmi, jo, will i halt schregglic Hemmige ha.
I ha Schiss, das muesch verstoh,
i kennt neydytsche Schmarre-n-uuseloo.
Lang han i mit mer kämpft und Albdraim gha.
Besser wär ich mit Änglisch, Dänisch oder Suaheli dra:
"Jambo Habari" - "Hakuna Matata"
isch aifacher als s'neydytsche Blabla.
In het Nederlands zou het veel eenvoudiger zijn,
Uff Dytsch muesch studiere: hets jetz no-n-e "H" in "Rhein"?
Uff Änglisch kasch s'Phantom voll duuresinge.
Uff Dytsch duesch scho in dr Ouverture (Ufertüre?) ringe,
"Fantom" oder "Vantom"? Schlussäntlig duets wie "Kondom"
klinge,
was die ghemmte Sänger in unseri Ohre (Oore? Ore?) bringe.
Dr Delfin (Delphin? Dälfin?) schwimmt im T(h)unersee?
Zem Gligg (Glygg?) han ich dert no nie e sone Flipper gseh
(gse?).
Statt Joghurt due-n-ich syt neischtem Fruchtquark mampfe,
bym Schryybe vom Yykaufszeedel duet mi Hirni dampfe:
Joghurt, Yogurt, Jogurt, Jokurt - was isch verglemmi richtig?
Jä Sie, in der Schuel Sigg das fir d'Note (Noote? Node?) wichtig!

D'Redaggtore in der BaZ mache Iberstund um Iberstund,
 drmit jo au kai Fähler in ihri Täfte kunnt.
 (Derby, was die zämmestiefe-n-au,
 interessiert jo sowieso kai Sau.)
 Känguruh wird zu Känguru
 Und unseri Ku macht Mu.
 Katolisch Spagetti mit Gianti an der Teke vom Teater
 Alles ohni (Oni?) "H", Dir schwirrt dr Kopf, de hesch e Kater
 (Kather?)
 D'Meerhait vo Gams isch Gämse
 und vo Hans ischls Hänse
 Nimmsch dr Hamburger jetz mit Majonäse und Ketschöp z'Gämf?
 Das schysst mi firchterlig aa, jetz friss en halt mit Säm!
 Uff sini Swotsch luegt dr armi T(h)ropf
 und schmaisst e Bolle Matschi in Suppetopf.
 Bisch verkeltet, so hesch e Katarrh (Katarr? Qatar?).
 Hesch Häxeschuss, so isch dr Rugge starr (starrh?).
 Schiffffahrt het jetz verglemmi wieviel Eff total?
 Ich sag däm jetz halt "Bootsrais", ganz genial.
 Aber halt, haisstls Boot oder Bot? Jetz han i Mieh!
 Das isch grad so kompliziert wie mit de Kieh!
 Me schrybt jo "Du" nit "Duh" und drum au "Ku" nit "Kuh".
 Und em Miggeli sag ich: "Du dumme Ku".
 Die arme Lehrer (Lerer? Leerer?), wo vor de Glasse stehn, oh, oh,
 oh,
 mien bald zem Pysichater, äh Püsiater, äh Püsikater, äh -
 Närvenarzt goh!
 Und das mit de Komma isch jo au so-n-e Sach,
 falsch gsetzt, scho griegsch mit em Le(h)(e)rer Grach.
 Um jo die Komma-Regle nit *verletzte,
 Duen, ich, halt, hinter, jedes, Wort, e, Komma, setze!
 Hesch no Problem, duesch d'Grammatig immer nonig verstoh?
 Mir lade Dy ii, uff unsere Schieler-Waage z'koh!
 D'Brofässore Schorsch und Niggi sinn Kapazit(h)ää(e)de.
 Nai, nit bym Schryybe - aigentlig eenter bym Bier biwä(h)r(d)te!
 (Die fyre sogar e Jubile(ä)um, es isch kugelrund!
 40 Joor nonstop Fasnacht, und immer no gsund!)
 Aber die ney Rächtschryybiebig, ogeh,
 isch jo aigentlig au e Bieridee!
 Het ächt d'Fäldschlessli, drmit s'Gschäft no besser lauft,
 haimlig d'Redaggz(t)ion vom "Duden" kauft?
 Duet's Dir vom Rächtschryybrelelääse stingge,
 kasch Di mit War-Car-Hür-Schlessli go bidringge!

(Jetzt hät is iberstande, wuff,
 Ab in d'Baiz, wo-n-i aine suff!
 Dr neydytsch Zeedel isch k(h)omb(p)let(t)(h).
 Albdraim han i gha, znacht im Bett!)

D'Ladäame-Uusstellig isch vom Määntig znacht, em 17. Hoornig, bis
 am Mitwuch demorge, em 19. Hoornig, uff em Minschterblatz -
 Mir fraien is uff Ihre Bsuech.